



Luta Hamutuk

INSTITUTU BA PESQUIZA/INVESTIGASAUN, ADVOKASIA NO KAMPAÑA
Timor-Leste Institute for Research, Advocacy and Campaigns

Email Add: lutahamutuk2005@yahoo.com or lutahamutuk.timorleste@gmail.com

Address: Rua Gov. Celestino da Silva-Farol, Aldeia Lirio, Suco Motael, Vera Cruz, Dili

PO. BOX: 1034, Correios, Dili, Timor-Leste

Tel: (+670) 332 2619 or (+670) 726 3783 & 724 3966

Komunikadu da Imprensa

Deklarasaun Presidente da Republika kona-ba Konstruksaun Oliu Pezadu Hatudu Lolos Kontra Prinsipiu Ukun Rasik An no Anti-demokrasia

Inisiu kedan ema barak kontra makaas ba konstrusaun oliu pezadu. Razaun fundamental mak *primeiru*: governu seidauk apresenta estudu viabilidade ba konstrusaun Sentru Eletrisidade uza Oliu Pezadu; *segundo*: oliu pezadu laos alternativu ida mak relevante ho kondisaun real iha Timor Leste nune Timor sei importa oliu pezadu husi rai liur; no *terseiru*: utilizaun oliu pezado ba enerjia iha nasaun barak komesa la- uza ona (husik) tamba la-sustentavel, kustu manutensaun makaas no estraga meu- ambiente.

Hakarak ka lakohi, governo hala'o nafatin konstrusaun oliu pezadu no hetan suporta maximu husi orgaun soberano estadu nian (husi Parlamento Nasional no Presidente da Republika). Tamba-ne'e, iha tinan kotuk komesa ona halo konstrusaun Sentru Eletrisidade Oliu Pezadu iha Hera, Sub-distrito Cristo Rei. Nune, foin dadaun iha dia 15 de Janeiro 2010 ofisialmente halo ona lansamentu **Premeira Pedra** ba iha fatin konstrusaun ne'e.

Relasiona ho kontrusaun oliu pezadu liu husi karta komunikadu ida ne'e, Luta Hamutuk kestiona makaas deklarasaun husi Presidente da Republika, Senhor DR. Jose Ramos Horta nebe hato'o deklarasaun liu husi jornal *Suara Timor Lorosa'e* (16/01/10) nebe hateten katak "**.....ema nebe mak halo kritika makaas ba konstrusaun oliu pezadu, nunka estuda konaba teknolojia mundu modernu nian.sira nebe mak halo kritika sira hanoin katak sira mak resposta ba governasaun, nebe sira mak preokupa liu fali meu ambiente duke ita iha governu i ita nebe hahu funu iha 74 la-preokupa, sira mak derepente preokupa liu fali ita**". Deklarasaun Chefe do Estadu ida ne'e, Luta Hamutuk konsidera katak Presidente da Republika la-hatudu nia maturidade politika nudar lideransa maximu, la fo lisaun diak ba politika iha jersaun futuru oin mai, la valoriza normais demokrasia no koko atu minimiza partisipasaun povu hodi halo kontrollu ho kritiku ba prosesu dezenvolvimentu rai ida ne'e. Deklarasaun ida ne'e mos indika katak, lideransa nasaun ida ne'e koko atu minimiza kapasidade

intelektual Timor-oan rasik hodi partisipa no hadiak dezenvolvimentu rai laran maibe deklarasaun ne'e atu hasae tan dependensia makas ba iha intelektual sira husi rai liur.

Hodi hateten dala ida tan katak, deklarasaun ida ne'e ami konsidera katak Presidente da Republika la valoriza direitu sidadaun Timor hodi partisipa iha prosesu dezenvolvimentu nebe nudar Estadu de Direitu e Demokratiku. Tamba-ne'e, iha ukun rasik an ida ne'e demokratikamente ema hotu iha direitu atu partisipa no kontrolla lalaok dezenvolvimentu nudar valor husi ukun rasik an. Tamba-ne'e, Luta Hamutuk absolutamente rezeita deklarasaun Presidente da Republika nudar simbollu demokrasia no unidade nasional, ho nia deklarasaun ida ne'e hatudu katak Presidente la-valoriza prinsipiu ukun rasik an hodi kaer rasik kuda tali no **anti-demokrasia**. Luta Hamutuk husu ba ukun nain sira atu halakon estetmentu sira nebe mak bele kria instabilidade politika tamba egoismu no arogansia politika ema ida ka grupo balun iha estadu ida ne'e

Ho konsensia tomak Luta Hamutuk konsidera katak dezenvolvimentu infrastruktura eletrisidade ne'e importante duni ba interese nasional tamba eletrisidade nudar fator ida nebe mak sei determina lalaok dezenvolvimentu iha rai laran iha seitor hotu. Maibe presiza konsidera mos katak politika dezenvolvimentu infrastruktura tenke lao ho prudente, adekuadu, integradu no-mos partisipasaun povu. Signifika katak, wainhira ita halo dezenvolvimentu iha seitor ida, presiza tetu didiak no kuida atu nune labele prejudika fali seitor seluk nebe mak mos importante ba futuru rai ida ne'e. Tamba ne'e ukun nain sira tenke konsiente katak hahu funu iha 1974 ne'e aspeitu ketak ida ho asuntu teknolojia iha mundu modernu nian, tamba konseitu rua ne'e diferente no la-hanesan.

Luta Hamutuk kestiona makaas tamba nudar sidadaun Timor Leste, ita hotu iha direitu nebe mak hanesan hodi preokupa ba prosesu politika no dezenvolvimentu mak lao iha rai laran. Nune laos ema hahu funu iha 1974 deit mak iha preokupasaun ba interese rai ida ne'e, maibe jersaun foun mos iha direitu, dever no responsabilidade atu preokupa prosesu tomak mak akontese iha rai ida ne'e. Tamba desizaun politika mak ukun nain sira deside agora nia implikasaun ba ema hotu nia moris, laos ema mak hahu funu iha 1974 deit maibe povu iha rai doben ida ne'e. Hakarak klarifika mos katak, Luta Hamutuk rekoifese no respeita funu nain sira mak hahu funu iha 1974 hodi liberta povu no rai ida ne'e, tamba ne'e jersaun sira mak hahu funu presiza mos fo valor ba prinsipiu ukun rasik an nebe ita hotu hakarak kaer rasik 'kuda talin' no laos atu depende ba ema seluk.

Dili, 19 de Janeiro 2010

(Mericio AKARA)
Direitor Esekutivu Luta Hamutuk
Tel: (+670) 7263783